



SALA STAMPA DELLA SANTA SEDE **BOLLETTINO**

HOLY SEE PRESS OFFICE BUREAU DE PRESSE DU SAINT-SIÈGE PRESSEAMT DES HEILIGEN STUHL
OFICINA DE PRENSA DE LA SANTA SEDE SALA DE IMPRENSA DA SANTA SÉ
BIURO PRASOWE STOLICY APOSTOLSKIEJ دار الصحافة التابعة للكرسي الرسولي

N. 0228

Sabato 03.05.2003

LETTERA DEL SANTO PADRE AL LEGATO PONTIFICIO ALLE CELEBRAZIONI DEL 750° ANNIVERSARIO DELLA CANONIZZAZIONE DI SANTO STANISLAO, VESCOVO E MARTIRE (KRAKÓW, 11 MAGGIO 2003)

LETTERA DEL SANTO PADRE AL LEGATO PONTIFICIO ALLE CELEBRAZIONI DEL 750° ANNIVERSARIO
DELLA CANONIZZAZIONE DI SANTO STANISLAO, VESCOVO E MARTIRE (KRAKÓW, 11 MAGGIO 2003)

In data 22 marzo 2003, il Santo Padre ha nominato l'Em.mo Card. Joseph Ratzinger, Prefetto della
Congregazione per la Dottrina della Fede, Suo Inviato Speciale alle celebrazioni del 750° anniversario della
canonizzazione di Santo Stanislao Vescovo e Martire, in programma a Kraków (Polonia) l'11 maggio 2003.

Il Cardinale Legato sarà accompagnato da una Missione composta da:

- Rev.do Mons. Jan Maciej Dyduch, Professore dell'Accademia Pontificia di Teologia a Kraków;
- Rev.do Łukasz Kamykowski, Pro-Rettore della medesima Accademia.

Pubblichiamo di seguito la Lettera che il Santo Padre ha inviato al Suo Legato:

• LETTERA DEL SANTO PADRE

Venerabili Fratri Nostro

Iosepho S.R.E. Cardinali Ratzinger

Congregationis pro Doctrina Fidei Praefecto

Dum sanctam Missam peragebat, in qua "Salvator noster... Sacrificium crucis in saecula perpetuavit"
(*Sacrosanctum Concilium*, 47), sanctus Stanislaus Episcopus a rege Boleslao ferociter est necatus. Hoc modo
ipse proprio sanguine in altare profuso plane confirmavit quod populum fideliter docuit et virtute recepti
sacerdotii in Mysterio eucharistico pie celebravit.

Sed martyrium eius, quod omnino est animadvertendum, veluti culmen exstitit sollicitae curae veri Pastoris, qui

imminente periculo in silentium non fugit, sed oves sibi concreditas tuendo eas "in finem dilexit" (Io 13,1). Hanc ob rationem, cum oppressos et iniuriam patientes defenderet, vitam suam pro eis posuit.

Ideo haud est mirandum eundem Sanctum, cuius Sedem de nutu divino anno MCMLXIV recepimus moderandam, per saecula in populo ornatum esse maxima veneratione, et Nobis quoque exemplar praecipuum et caelestem factum esse Protectorem. Nam sive veluti archidioecesis Cracoviensis sacrorum Antistes sive deinde universalis Ecclesiae Pastor, pluries eius validam imploravimus intercessionem eiusque aliis pastoribus imitandam commendavimus solidam fidem et sublimem caritatem.

Cum autem nunc septingentesima quinquagesima anniversaria incidit memoria a sollemni eius canonizatione, quam Assisii in ecclesia sancti Francisci Decessor Noster Innocentius IV persolvit, optima praestatur occasio merita et gloriam sancti Stanislai magis adhuc extollendi. Laeto igitur animo accepimus petitionem Venerabilis Fratris Nostri Francisci S.R.E. Cardinalis Macharski, Archiepiscopi Metropolitae Cracoviensis, ut Legatum Nostrum mitteremus, qui in celebrationibus Cracoviae in ecclesia cathedrali Wawel et in loco vulgo Skalka, ubi videlicet in ecclesia sancto Michaëli Archangelo dicata sanctus Episcopus martyrium passus est, die XI proximi mensis Maii Nostram gereret Personam.

Tibi quidem, Venerabilis Frater Noster, honorificum hoc munus in Patria Nostra semper fideli explendum libentes committimus teque **Legatum Nostrum** nominamus, qui tot per annos fideliter praestanti fungeris officio Congregationis pro Doctrina Fidei Praefecti et iugiter sollicitus es ut catholica fides totum per orbem pura et integra conservetur, atque Nostram in Personam plurima aestimationis et affectus ostendis testimonia.

Sacris ergo praesidebis celebrationibus, adstantes Nostro nomine imo ex corde salutabis iisque sensus ostendes eximiae Nostrae caritatis. Proinde cohortaberis omnes christifideles, ac praesertim sacros Pastores, claro exemplo sancti Episcopi et Martyris incitados, ad fidem catholicam vigilanter servandam bonisque moribus usque probandam. Qui omnes, gratias agentes Deo propter tam eminentem caelestem Cracoviae totiusque Poloniae Patronum, eius per intercessionem sese late aperiant ad Divinam recipiendam Misericordiam fratribusque assidue implorandam.

Benedictionem denique Apostolicam, divinae gratiae auspicem atque propensae Nostrae voluntatis testem, tibi in primis impertimus, quam postea Cracoviensis dilectae Ecclesiae Archiepiscopo, qui eam fere XXV per annos humiliter ac prudenter regit, deinde Episcopis eius Auxiliaribus, cunctis sacerdotibus, religiosis viris et mulieribus omnibusque sacrorum rituum participibus nomine Nostro peramanter largiaris volumus.

Ex Aedibus Vaticanis, die XI mensis Aprilis, anno MMIII, Pontificatus Nostri vicesimo quinto.

IOANNES PAULUS II

[00685-07.02] [Testo originale: Latino]
